

28 AUG 1999

MALAYSIA PERLU TUMPU PADA SUKAN YANG MEMERLUKAN KECEKAPAN DAN KEMAHIRAN

KUALA LUMPUR, 28 Ogos (Bernama) -- Badan-badan sukan tanah air dinasihatkan memberi perhatian serius kepada acara sukan yang menggunakan kecekapan dan kemahiran untuk bersaing di peringkat dunia.

Menteri di Jabatan Perdana Menteri Datuk Mohamed Tajol Rosli Ghazali hari ini berkata negara boleh bersaing di peringkat dunia dengan menggunakan akal fikiran, kecekapan dan semangat tinggi dalam sukan seperti boling, boling padang dan badminton,

Katanya Perdana Menteri Datuk Seri Dr Mahathir Mohamad pernah berkata negara tidak perlu bersaing dengan saiz atlit luar atau acara sukan menggunakan kekuatan tenaga tetapi penumpuan harus diberi terhadap sukan yang lebih kepada kecekapan dan kemahiran.

"Kerajaan telah membelanjakan beribu juta ringgit untuk pembangunan sukan dan infrastruktur kesukanan negara dan kita juga akan melahirkan jaguh dunia daripada sukan pemotoran semasa Kejohanan Formula One di Litar Formula One Sepang Oktober ini," kata Tajol Rosli semasa merasmikan Kejohanan Jet Ski ke-5 Malaysia 1999 di Taman Tasek Titiwangsa di sini.

Kejohanan Jet Ski itu berlangsung sehingga 12 Sept dianjurkan oleh Bidari Wira Sdn Bhd (BWSB) dan disertai 55 orang dari Thailand, Singapura, Brunei, Perancis, Australia, Denmark, Filipina dan Malaysia.

-- BERNAMA

MEO RON